

陳佩珩公生壙記並銘

陳佩珩觀察六旬晉一之歲湘省商界同人以其有保存公利之惠釀錢發書思徵文以頌之陳君三辭同人意未慊也陳君曰吾聞善頌者頌其從先大夫於九原文璋少孤依於母兄今先太夫人先中丞兄俱託幽宮於西鄉故自營生壙於龍迴塘之原與相瞻望以寄永思欲自爲志銘而未遑也其有能達斯志者乎於是僉議以爲與君兄弟交遊姻好最久者莫若闔運則具幣來請言先是君兄以留壩君循政來告以官書例多虛文未及詮實不遑傳也及中丞兄逝復值變亂不得會葬正欲

於君發之新政之行君被舉爲議員故於時局得以維持補救
時議患國貧尤亟而君有宏遠之才不恤破家以求利人人所
畏難而不敢興者毅然獨任之人人危慮而君不懼竟以成立
若商錢局電燈局初始轍費數百萬官民所不敢任也時湘人
應詔集巨貲興大工曰粵漢鐵路而設漢口大局總其事湘局
以余肇康領之成功裁百分之一避亂而去衆議推君代之孫
文總天下鐵路已而棄去譚人鳳代之譚故新化諸生交通輕
俠湘督懼譚跋扈言無不行譚至則首詰路貲指索存款君一
切不應又面拒之人或詢譚路政但切齒憤歎終不敢問於是

京中立交通部議還民貲以張緝光領湘路張條上苛例與君
初訂頗殊君執前合同部議不能奪乃仍如約計年還本息銀
得七百餘萬兩自湘州分部以來無此富也然君無所利危身
排眾而爲之商民大譴又嘗白富商之冤又收養無告孤女嫁
之士人更恤養其遺腹子他所建議興利除害事甚眾眾之論
君皆以爲豪張振奇人也而君逡逡儒服篤厚肫肫慕古賢聖
之風雅尙有寄有子二人皆令海外遊學當欲立己不慕浮華
故其樂道反真非夫厭世達觀之比也昔楊王孫矯俗而命薄
葬趙邵卿逢亂而營生壙君之自壽與人之壽君又何異乎乃

爲銘曰

太邱之門昆弟莘莘旣傳循吏亦顯儒臣季也懷寶乃邁時屯
長材用屈壯畧斯申島夷工商敢醜大邦賜不受命殖貨能彊
蠡稱三徙句吳用亡誰爲計臣實陋弘羊湘軍氣盛長沙國小
昔用中興今成魯縞路電之光自他有曜呼吸風雷梯航琛寶
黃鵠高舉丁鶴知歸言瞻城郭還升赫羲清湘幽默楓林鬱猗
中有世宅旁連碧厓可以息塵吾其歸化川谷縈回林泉間暇
陟降有憑懿親攸寫儻有達人於斯稅舍

湘潭王闔運撰